

Գ. Խ. Սարգսյան

ՀԱՅՍՏԱՆԸ Մ. Ք. Ա. II ԴԱՐՈՒՄ

(Հելլենիստական շրջանի պատմության լուսարանման համար Մ. Խոբեմացու «Հայոց պատմության» տվյալների սխտեմատիկ օգտագործման փորձ)

Հելլենիստական Արևելքի պատմության մեջ մ. թ. ա. III և II դարերի էզրը շրջադարձային կետ է, որը նշանավորվում է կարևորագույն ու հետևանքներով հարուստ մի իրողությամբ՝ Առաջավոր Ասիայի պատմաբան է դուրս գալիս մի նոր հզոր ուժ՝ Հռոմեական հանրապետությունը։ Հռոմը՝ անցյալում քաղաք-պետությունը, հետզհետե գրավել էր ամբողջ Ապենինյան թերակղզին, մոտակա կղզիները՝ Սիցիլիան, Կորսիկան, Սարդինիան, ջախջախել Արևմտյան Միջերկրականում իր գլխավոր ախոյանը հանդիսացող Կարթագենի պետությունը և տիրացել Միջերկրականի ափերի մեծ մասին։ Այժմ նրա ուշադրության կենտրոնում էր գտնվում Բալկանյան թերակղզին՝ հունական քաղաքները և հելլենիստական Մակեդոնիան։ Սակայն դեպի Բալկաններն էին ձգտում նաև Ասիայի տիրակալները՝ Սելևկյանները։ Կողմերը ուշիուշով հետևելով էին միմյանց քայլերին։ Հնդհարումը տեղի ունեցավ II դարի 90-ական թվականների վերջին և ավարտվեց Սելևկյան Անտիոքոս Գ-ի պարտությամբ։ 191 թ. նրա զորաբանակը ջարդվեց Հունաստանի տերիտորիայի վրա՝ Թերմոպիլեում, որից հետո հռոմեական զորքերը անարգել անցան Սևծովյան նեղուղներով և առաջին անգամ ոտք դրին Ասիայի հողը։ Վճռական ճակատամարտը տեղի ունեցավ Մագնեսիա քաղաքի մոտ 190 թ. (Liv., XXXVII, 38 և հետ., App., Syr., 31 և հետ.)։ Հռոմեական զորքը կրկնակի անգամ փոքր էր Անտիոքոսի զորքից, բայց նա հաղթեց և այդ հաղթանակը ծանրագույն հետևանքներ ունեցավ Սելևկյանների պետության համար։ Ապամենյայում 188 թ. կնքված պայմանագրի համաձայն նրանք զրկվեցին գրեթե ամբողջ Փոքր Ասիայից, պարսավորվեցին վճարել հսկայական ռազմատուգանք և այլ զիջումներ արեցին¹։ Քացի, այդ, թուլացան Սելևկյանների տիրության ծայրամասային երկրները զսպող կապերը։ Հատկապես Հուլյաստանը անջատվեց նրանից և վերստին անկախություն ձեռք բերեց։ Այսպիսով, Հռոմի առաջին հաջողությունը Ասիայի հողի վրա, անկախ իր հետագա հետևանքներից, բարենպաստ եղավ Հայաստանի համար։

Հայաստանը III դարի ընթացքում, թեև մեծ մասամբ ինքնուրույն թագավորություն է կազմել², բայց և այնպես գտնվել է հարավային հզոր հարևանի ուժեղ ազդեցության ոլորտում և քաղաքական ու տերիտորիալ զարգացման հնարավորությունների առումով եղել է անբարենպաստ պայմաններում։ Սա-

¹ H. Bengtson, Griechische Geschichte von den Anfängen bis in die römische Kaiserzeit, München, 1960, էջ 470 և հետ.։

² Հ. Մանանդյան, Քննական տեսություն հայ ժողովրդի պատմության, հատ. II, Երևան, 1944, էջ 100 և հետ.։

կայն նույն այդ ազդեցությունը հելլենիստական դարաշրջանի հենց սկզբից նշանակալից դրական դեր է խաղացել երկրի ներքին սոցիալ-տնտեսական կյանքի ասույարեղում, զարկ տալով նրա զարգացմանը ստրկատիրական հասարակարգի ուղիներով: Հայաստանը ներգրավվել է Առաջավոր Ասիայի տրեստեսական բուռն առաջընթացի հորձանքը:

Այս երկու հակասական և իրերամերժ հանգամանքները՝ տնտեսական զարգացումը մի կողմից և քաղաքական կաշկանդվածությունը՝ մյուս կողմից, չէին կարող երկար ժամանակ կողք կողքի գոյություն ունենալ. արտաքին պատերազմները պետք է տեղի տային ներքին աճի ու հզորացման առջև, մանավանդ որ գոյություն ունեւր ու հասունացել էր դրա կարևորագույն մի նախապայմանն ու գործոնը:

Այդ նախապայմանը ստեղծվել էր հայ ժողովրդի կազմավորման ընթացքում, որ մոտենում էր իր ավարտին: Հայկական բարձրավանդակի ծայրամասերը արդեն մեծ մասամբ ներգրավվել էին հայկական էթնոսի և հայերին լեզվի ոլորտը, բայց տակավին շարունակում էին գտնվել պետական այլ միավորումների ընդերքում: Արևմտյան շրջաններում, ճիշտ է, ստեղծվել էին մանր ինքնուրույն պետական կազմավորումներ, ինչպիսիք էին՝ Փոքր Հայքը և Մոփքը, բայց դրանցից յուրաքանչյուրն ընդգրկում էր հայկական էթնոսի համեմատաբար փոքր մասը: Այս պայմաններում բարձրավանդակի կենտրոնական շրջանները գրավող Երվանդյանների թագավորությունը պետք է դառնար այն կորիզը, որից աճելու էր միացյալ հայկական պետությունը:

Հայ ժողովրդի պատմական կյանքի այս վճռական պահին մեծ դեր էր վիճակված Արտաշես Ա-ին (189— մոտ. 160 թթ. մ. թ. ա.), որի մասին անտիկ պատմագրության պահպանած տեղեկությունները թեև սակավաթիվ են ու մանրամասնություններից զուրկ, բայց և այնպես թույլ են տալիս դատելու նրա գործունեության կարևորագույն կողմերի մասին: Հետաքրքրական տեղեկություններ է հաղորդում Արտաշեսի մասին նաև հայ պատմական ավանդությունը, որը մեզ հասել է Մովսես Խորենացու «Հայոց պատմության» միջոցով: Վերջապես Արտաշեսից ունենք նաև վավերագրներ, իսկ վավերագրերը, ինչպես հայտնի է, բացառիկ հազվագյուտ երևույթ են հայ ժողովրդի հին պատմության աղբյուրների շարքում:

Ստրաբոնի հաղորդումից պիտենք, որ Արտաշեսը (Արտաքսիաս) նախապես եղել է Հայաստանի՝ Սելևկյանների կողմից նշանակված կառավարիչը (ստրատեգոս), և ապա գրավել է գահը, տապալելով նախորդ դինաստիայի շերտին ներկայացուցիչ՝ Երվանդին (Օրոնտես) ու դարձել նոր դինաստիայի հիմնադիր (Strab., XI, 14, 15):

Պատմական խոշոր դեմքերի շուրջը միշտ ավանդություններ են հյուսվում, որոնք հաճախ արտացոլում են իրական դեպքերը: Ավանդությունների մի որոշակի տարատեսակ գոյություն ունի հատկապես նոր դինաստիաների հիմնադիրների ծագման, մանկական տարիների ու զահակալման մասին: Իրենթև բոլոր նման ավանդությունների համար ընդհանուր է այն, որ հերոսը նախորդ թագավորի ազգականն է, սովորաբար՝ իգական գծով, որ թագավորը ինչ-ինչ պատճառներով, մեծ մասամբ իշխանությունից զրկվելու երկյուղից պրզված, հետապնդում է մանուկ հերոսին, փորձում սպանել նրան: Սա հրաշքով ազատվում է, տարիներ է անցկացնում անհայտության մեջ՝ մի հասարակ մարդու՝ հովվի կամ հողագործի ընտանիքում, ապա վերադառնալով տիրանում

զահին ու պատժում իր հետապնդողին: Նման ավանդություններ, որոնք ընդգրկում են կամ ամբողջ այս սյուժեն կամ նրա մի մասը, գոյություն ունեն ակկադյան գինաստիայի հիմնադիր Սարգոնի³, Ռոմուլոսի (Plut., Rom., 3 և հետ.), Կյուրոս Մեծի (Her., I, 108 և հետ.) և շատ ուրիշների մասին: Ահա այդպիսի մի ավանդություն էլ հյուսվել է Արտաշեսի շուրջը ու մեզ հասել հուրենացու «Հայոց պատմության» էջերում: Երվանդ թագավորը հետապնդում է մանուկ Արտաշեսին, սա փախչում, փրկվում է նրա ձեռքից, ապաստանում հովիվների մոտ: Տարիներ անց Արտաշեսը տիրանում է հայոց զահին, իսկ Երվանդը ընկնում է պալքարում (Մ. հոր., II, 37 և հետ.):

Ի տարբերություն Ստրաբոնի, հուրենացու մոտ Երվանդը ներկայանում է ոչ թե որպես օրինական թագավոր, այլ որպես բռնակալ-թագավոր, թագավորակալն տոհմին պատկանող կանանցից մեկի ապօրինի զավակ, իսկ Արտաշեսը՝ որպես զահից զրկված թագաժառանգ: Այսպիսի երանգավորումը, հավանաբար, Արտաշեսյան գինաստիայի կողմից հետագայում առաջադրված պաշտոնական տեսակետի արտացոլումը լինելով հանդերձ, նաև պատմականորոշ հիմք ունի և ճիշտ հասկացվելու դեպքում ոչ թե հակասում է Ստրաբոնի տվյալներին, այլ լրացնում դրանք:

Հայտնի է, որ Արտաշեսը Սևանի ավերին գտնված արամեական արձանագրություններում անվանում է իրեն «Արտաշես արքա, Զարեհի որդի, Երվանդական»⁴, այսինքն իրեն համարում է իր իսկ տապալած Երվանդյան գինաստիայի շառավիղ: Պետք է ասել, որ այս քայլի մեջ արտառոց ոչինչ չկա, հին աշխարհում այն եթե ոչ սովորական, գոնե հաճախակի հանդիպող երևույթ էր, որի դրդապատճառները զուտ քաղաքական բնույթ էին կրում: Իշխանությունը զրաված նոր տիրակալը իրեն հայտարարում էր նախորդ գինաստիայի չարունակողը, որպեսզի դրանով ամրապնդի իր իշխանության իրավական հիմքերը և բարձրացնի իր հեղինակությունը: Հեռու չգնալու համար, որպես օրինակ կարելի է հիշատակել հենց նույն Երվանդյաններին, որոնք, լինելով ըստ Ստրաբոնի պարսկական մի մեծատոհմիկի սերունդ (Strab., XI, 14, 15), հայտարարում էին իրենց Աքեմենյանների հետնորդներ⁵:

Նմանօրինակ քայլ է կատարել և Արտաշեսը, որին հավանորեն հատկապես հրապուրել է Երվանդյանների միջոցով Աքեմենյանների տան հետ առնչվելու հնարավորությունը: Սակայն Երվանդյանները իրենց հավակնությունների համար իրական հիմք ունեին. նրանցից մեկը՝ Հայաստանի սատրապ Երվանդը (մ. թ. ա. V—IV դարերի եզրին) իսկապես որ ամուսնացած է եղել Աքեմենյան Արտաքսերքսես Գ-ի դստեր Հոռոդոունների հետ⁶: Այսպիսի մի հիմք ունեցած պիտի լինի նաև Արտաշեսը: Հավանական է, որ նա իգական գծով ծագում էր իշխող գինաստիայից (մի բան, որ հուրենացու մոտ, վերը հիշատակված

³ Sht. В. В. Струве, Хрестоматия по древней истории. т. I, М., 1936, էջ 42:

⁴ Այս արձանագրություններից առաջմ գտնված է հինգ օրինակ: «Երվանդական» տերմինի մասին տե՛ս А. Я. Борисов, Надписи Артаксия (Арташеса), царя Армени, ВДИ, 1946, № 2, էջ 103. И. М. Дьяконов, К. Б. Старкова, Надписи Артаксия (Арташеса I), царя Армени, ВДИ, 1955, № 2, էջ 168, ծան. 1. Գ. Տիրացյան, Արտաշես Ա-ի նորագյուտ արձանագրությունը, ՀՍՍՌ ԳԱ «Տեղեկագիր» (հաս. գիտ.), 1957, № 10, էջ 108:

⁵ K. Humann und O. Puchstein. Reisen in Kleinasien und Nordsyrien, Textband, Berlin, 1890, էջ 303:

⁶ Նույն տեղում, էջ 283, 305, ինչպես նաև Xen., Anab., III, 4, 13:

պաշտոնական տեսակետին հատուկ դերերի փոփոխմամբ, վերագրված է բըռնակալ Երվանդին): Անուղղակիորեն դրա օգուտն է վկայում նաև այն հանգամանքը, որ «Արտաշես» անունը ընդունված է եղել Երվանդյանների տոհմում. նեմրուժ դադի արձանագրություններում այն հանդիպում է «Արտասուրա» ձևով⁷: Արտաշեսի հայրը՝ Զարեհը՝ Հայաստանի մեծատոհմիկներից մեկը, կարող էր ամուսնացած լինել Երվանդյան թագավորող տոհմին պատկանող կանանցից մեկի հետ, այստեղից էլ Արտաշեսի առնչությունը այդ դինաստիային:

Արտաշեսը ծնված պիտի լինի մ. թ. ա. 230-ական թվականներին: Նա հասունացել է այնպիսի մի ժամանակ, երբ Սելևկյանները իրենց գերիշխանությունն էին հաստատել Հայաստանի վրա: Ինչպես իր սերնդի և ժագման շատ մարդիկ, նա ծառայել է Սելևկյանների բանակում, հասել բարձր պաշտոնների և ի վերջո Անտիոքոս Գ-ի կողմից Հայաստանի ստրատեգ (կառավարիչ) նշանակվել: Հայաստանի հարավ-արևմտյան մասում՝ Ծոփքում, ստրատեգ է կարգվել Արտաշեսի զինակիցն ու ազգակիցը, մի գուցե նաև տոհմակիցը՝ Զարեհը⁸:

Թե երբ է տեղի ունեցել Երվանդյանների բարձումը, ստույգ ասել դժվար է: Հնարավոր է, որ նրանք տապալվեցին Հայաստանում սելևկյան ստրատեգների հաստատման կապակցությամբ⁹: Համենայն դեպս վերջին Երվանդը, ինչպես երևում է հորենացու հաղորդածից, զիջել է գահը միայն կատաղի պայքարից հետո¹⁰:

Արտաշեսն ու Զարեհը որոշ ժամանակ կառավարել են որպես Սելևկյանների ներկայացուցիչներ, միաժամանակ, իհարկե, հող նախապատրաստելով ապագա անկախության համար: Երբ Անտիոքոս Գ-ի և հռոմեացիների միջև ծավալված պայքարը հասավ իր վախճանին և Անտիոքոսը, ինչպես ասվեց, ծանր պարտություն կրեց Մագնեսիայի մոտ (190 թ.) Հայաստանի ստրատեգները, որոնք այդպիսի մի առիթի էին սպասում, հարեցին հռոմեացիներին և թոթափեցին Սելևկյանների լուծը, հայտարարելով իրենց անկախ թագավորներ՝ յուրաքանչյուրն իր կառավարած երկրամասում:

Հույն պատմաբան ու աշխարհագրագետ Ստրաբոնը տալիս է այդ իրադարձությանը հաջորդած պատմական անցքերի՝ հայկական ու պարսկական սահմանների ընդարձակման հակիրճ բաց զարմանալի վառ իր հանրահայտ նկարագրությունը (XI, 14, 15) եզրափակելով այն «այսպիսով բոլորը միալեզու են» բառերով: Ստրաբոնը այս վիճակը գնահատում է որպես իր նկարագրած նվաճումների անմիջական հետևանք: Մակայն հայացք ձգելով ժամանակի պետական բազմատարր ու խաչտաբղետ միավորումների վրա (բերենք որ-

⁷ K. Humann und O. Puchstein, հիշ. աշխ., էջ 283:

⁸ Արտաշեսի և Զարեհի տոհմակցության մասին է ակնարկում վերջինի անվան և առաջինի որ անվան համընկնումը:

⁹ Գ. Տիրացյան, Մովսես Խորենացու «Հայոց պատմության» և Ստրաբոնի «Աշխարհագրության» մի քանի դրվագներ Հայաստանի ն. մ. թ. III—II դդ. պատմության մասին, «Բանբեր Մատենադարանի», № 6, 1962, էջ 17 և հետ.:

¹⁰ Խորենացին մանրամասն նկարագրում է այդ պայքարը, նշում «պարթևական» զորքերի գլուխ կանգնած Արտաշեսի երթուղին, պատմում Երվանդավանի մոտ տեղի ունեցած ճակատամարտի, Երվանդի փախուստի, Երվանդաշատ մայրաքաղաքի ուսման և Երվանդի վախճանի մասին (II, 46): Այս տեղեկությունների մի որոշակի մասը անշուշտ պատմական է:

պես օրինակ Սելեկյանների պետությունը), համոզվում ենք, որ տարբեր էթնիկական տարրերի զուտ քաղաքական միավորումը, անգամ երկարատև ժամանակով, երբեք չէր հանգեցնում այդ տարրերի միալեզու դառնալուն, թեև տեղի էին ունենում համահարթման այլ պրոցեսներ: Սելեկյանների պետությունն իր գոյության 200-ից ավելի տարիների ընթացքում ամենևին միալեզու չդարձավ, իսկ չէ որ Ստրաբոնին Արտաշեսի ժամանակից բաժանում է ավելի կարճ ժամանակաշրջան¹¹:

Միալեզու դառնալու պատճառն, ուրեմն, սոսկ նվաճումների մեջ չէր, այլ առավել չափով նրանց նախորդող ազդակազմավորման այն պրոցեսների, որոնցով, ինչպես ասվեց, համակվել էր Հայկական բարձրավանդակը: Նվաճումները քաղաքական ձևավորում ավելցին արդեն իսկ նշանակալից չափով գոյություն ունեցող էթնիկական այդ իրավիճակին, և, իհարկե, նպաստեցին նրա հետագա ամրապնդմանը, այսինքն հայկական էթնոսի զարգացմանը¹², Ստրաբոնի նկարագրած իրադարձությունները, այսպիսով, ավելի ճիշտ կլինի բնութագրել «միավորում» և ոչ «նվաճում» բառով:

Ստրաբոնի պատմածից երևում է, որ հայկական պետությունը ընդարձակվել է բոլոր շուրս ուղղություններով. դեպի արևելք՝ Ատրոպատյան Մարաստանի կողմը, հյուսիս՝ Վիրքի կողմը, արևմուտք՝ Փոքր Հայքի կողմը և վերջապես հարավ՝ Ասորիքի, այսինքն՝ Սելեկյանների պետության կողմը: Այս առաջխաղացման առանձին փուլերի հերթականության ժամանակագրությունը պարզ չէ, բայց հիմք կա կարծելու, որ Ստրաբոնի մոտ տեղ գտած թվարկման կարգը հիմնված է ժամանակագրական հերթականության վրա:

Արևելյան ուղղությամբ կատարված արշավանքների հետևանքով ձեռք բերված՝ Ստրաբոնի հիշատակած երեք երկրամասերից՝ Կասպիանեն, Փավնիտիս, Բասորոպեդա, վերջինս հավանորեն համընկնում է Պարսպատունիք գավառի հետ¹³, երկրորդի տեղը պարզ չէ, իսկ առաջինը՝ Կասպիանեն, քաջ հայտնի է: Դա Կուրի և Արաքսի միախառնման տեղից մինչև Կասպից ծովն ընկած երկիրն է, որը նույնանում է Փայտակարանի հետ¹⁴: Մ. Խորենացին այն անվանում է Կասբից երկիր¹⁵ և մանրամասնություններ հաղորդում Արտաշեսի՝ դեպի այդ կողմը կատարած արշավանքի մասին¹⁶: Խորենացու պատկերացմամբ, այդ երկիրը Հայաստանի իշխանության տակ է եղել դեռ Արտաշեսից առաջ և նրա օրոք ապստամբվել է: Արտաշեսը զորք է ուղարկել զորավար Սմբատի ղեկավարությամբ, որը ճնշել է ապստամբությունը և գերեվարել երկրի թագավորին ու բնակչության մեծ գանգվածներ:

Խորենացու «Հայոց պատմության»՝ Արտաշեսի գործունեությանը նվիրված գլուխներում հիշողություններ են պահպանվել նաև հյուսիսային արշավանքների մասին: Վրաց արքան Կաստամբեդնում է հյուսիսային կողմերը և գերի վերցնում արքայորդիներից մեկին՝ Զարեհին, որը նշանակված էր հյուսիսային զորքի հրամանատար: Արտաշեսը զորք է ուղարկում Վրաստան և ազատագրում Զարեհին (II, ԾԳ): Նույն այս արշավանքների պատմության վե-

11 Ստրաբոնը ապրել է մ. թ. ա. 60—մ. թ. 20 թթ.:

12 Հմմտ. Հ. Մանանդյան, Քննական տեսություն, Ա, էջ 118:

13 Հստ Ս. Նրեմյանի կարծիքի:

14 Տե՛ս Ս. Նրեմյան, Հայաստանի բոլոր Անշարհացիք, Երևան, 1963, էջ 57:

15 Մ. Խորենացի, II, ԾԳ, տես Ս. Նրեմյան, հիշ. աշխ., էջ 67, 88:

16 Տե՛ս Գ. Տիրացյան, հիշ. աշխ., էջ 8 և հետ.:

րաբերյալ ավելի մանրամասն մի վերսիս պահպանվել է «Քարթլիս ցխովրե-րա»-ում¹⁷, ուր նկարագրված է Լրեք արշավանք: Առաջին անգամ արշավում է ինքը՝ Արտաշեսը, գրավում Սյխեթը, հաջատակեցնում Լրկիրը և հեռանում: Իրկիրոգ անգամ արշավում է նրա որդի Զարեհը ձնշելու վրացիների և օսերի ուպստամբությունը: Զարեհը դուրի է բնկնում: Երրորդ անգամ՝ Արտաշեսը Սմբատ գորավարը՝ Արտավազդ և Տիգրան արքայորդիների հետ: Նրանք ազատում են Զարեհին և պայմանապիր կնքում, որի համաձայն վրացիները և օսերը պարտավորվում են պատերազմի պեղքում օժանդակ գործ տրամադրել Արտաշեսին և նրա պատկերով դրամ կտրել:

Թերևս նույն հյուսիսային արշավանքների արձագանքն է հնչում նաև հայերի և Հյուսիսային Կովկասի լեռնաբնակ ալանական ցեղերի՝ Վրաստանի տերիտորիայի վրա տեղի ունեցած պատերազմի պատմության մեջ¹⁸: Այս ցեղերի նվաճման մասին պատմելիս Խորենացին նորից հիշատակում է մեծ քանակությամբ մարդկանց գերեվարությունը դեպի Հայաստան:

Ստրաբոնի տեղեկությունները հյուսիսային արշավանքների մասին շատ որոշակի են. նրանց հետևանքով հայկական պետությանն են միացվել Պարիսպոն (Պարիսպոն) լեռների ստորոտի հողերը, այսինքն Ճորոխ գետի հովտի մի մասը, որը համապատասխանում է Տայքին¹⁹, Խորձենեն, այսինքն Կղարջք գավառը²⁰ և Գողարենեն, այսինքն Գուգարքը:

Արտաքին ընդարձակմանը զուգընթաց, հայկական պետությունն ապրում էր ներքին բուռն զարգացման ժամանակաշրջան: Մոտ անցյալի համեմատաբար փոքր և թույլ թագավորությունից, որի մեջ պահպանվում էին արեմենյան սատրապության վարչական կառուցվածքի շատ գծեր, Հայաստանը վերածվում էր տնտեսապես ուժեղ, ինքնուրույն ու ընդարձակ պետության և բնականաբար կարիք էր զգում բազմաթիվ բարեփոխությունների՝ տնտեսական, վարչա-քաղաքական, ռազմական, մշակութային և այլ բնագավառներում, որոնք և հետզհետե պետք է իրականանային:

Այդ բարեփոխությունների շարքում կարևոր տեղ է զբաղում հողային ռեֆորմը, որի անհրաժեշտությունը թելադրվում էր երկրում մասնավոր հողատիրության և ստրկատիրության զարգացման արագ տեմպերով: Այդ պրոցեսները, որոնց մասին անհրաժեշտ է ավելի մանրամասն պատկերացում տալ, անշուշտ ծայր էին առել դեռ շատ վաղուց, դեռևս Արեմենյանների տիրապետության ժամանակ, բայց առանձնապես ուժեղացել էին հելլենիստական պետությունների առաջացման ժամանակաշրջանից:

Սկզբնապես, երկրի բնակչության համեմատական նոսրության պայմաններում, երկրագործության համար պիտանի և հատուկ մեկիորատիվ աշխատանք չպահանջող բոլոր հողերը չէին, որ մշակվում էին: Այսպես, Քսենոֆոնի կտրած-անցած Հայաստանում գյուղերը, կամ ավելի ճիշտ գյուղախմբերը, միմյանցից բավական հեռու տարածության վրա էին դրվում (Xen., Anab.,

17 Տե՛ս Լ. Մ. Մելիքսեթ-Բեկ, Վրաց աղբյուրների Հայաստանի և հայերի մասին, Գ. Ա, Երևան, 1934, էջ 158—160:

18 Մ. Խորենացու հաղորդած այս ավանդության մեջ (II, V, VI) թերևս իրար են խառնած երկու պատմական անձնավորություններ. Արտաշես Ա-ը իր հյուսիսային արշավանքներով և Տրդատ Ա-ը (մ. թ. 66—մոտ 80 թթ.) ալանների դեմ իր մղած պատերազմներով:

19 Մ. Ս. Երևմյան, Հայաստանը բնույթով «Աշխարհացոյց»-ի, Երևան, 1963, տես քարտեզը:

20 Մ. Ս. Երևմյան, հիշ. աշխ., էջ 59, հմտ. Հ. Մանանդյան, Քննական տեսություն, էջ 117:

IV, 4—5)։ Խնդիրն այն է, որ համայնքի կողմից հողի մշակման հնարավորությունը չէր կարող անցնել որոշակի սահմաններից նաև ազատ հողերի գոյության դեպքում, որովհետև այն սահմանափակված էր համայնականների առկա աշխատավոր ձևերով, որոնց թիվը շատ դանդաղ էր աճում։

Այլ բան է մասնատիրական տնտեսությունը, որի մեջ կիրառվող ստրկական ուժի աճը կախված էր միայն տիրոջ կարողությունից՝ սահմաններից, այսինքն՝ ընդունակ էր հասնելու մեծ չափերի։

Հելլենիստական ժամանակաշրջանում մասնատիրական տնտեսությունների զարգացման համար ստեղծվեցին շատ բարենպաստ պայմաններ։ Տրեստեական ընդհանուր վերելքը (ներառյալ տարանցիկ ու ներքին առևտրի լայնացումը), որի մեջ էր ներգրավվել նաև Հայաստանը, ստրկական ուժի բաղմապատկման արտաքին, ինչպես նաև ներքին մեծ հնարավորությունները որոնք ընձեռվում էին մի կողմից բաղմաթիվ նվաճողական պատերազմներով, մյուս կողմից հասարակության սոցիալական շերտավորման ու բեռնացման ուժեղացմամբ, վերջապես նորանոր հողերի յուրացումը, մի բան, որ պետությունը խրախուսում և օժանդակում էր, բոլոր այս հանդամանքները խթանում էին Հայաստանի գյուղատնտեսության զարգացումը՝ ստրկատիրության ուղիներով։

Ահա այդ ժամանակներն էր, որ պիտի ծագեր «դաստակերտ», այսինքն՝ «ձեռքով մշակված» հողի հասկացությունը. «Երբ զինվորական ավագանին լուրացնում ու կենդանացնում էր ապարդյուն մնացած հողերը, որոնց վրա չէր տարածվում գյուղական համայնքների տիրապետման իրավունքը»²¹։ Այդ հասկացությունը առաջ էր գալիս ի տարբերություն հնից եկող «ագարակ»-ի, որը նշանակում էր ընդհանրապես վարելադաշտ-վարելահող։ Հետագայում այդ տերմինները նույնացան և հավասարապես օգտագործվում էին մասնատիրական տնտեսությունների նկատմամբ²²։

Աղբյուրների ներկա սուղ պայմաններում սկզբնական «ձեռքով մշակված վարելադաշտի» դեպի հետագայի կոմսլեքսային բարդ տնտեսություն-բնակավայրերը Հայաստանում անցած ուղու առանձին փուլերը չեն նշմարվում ու սահմանազատվում, և նման տնտեսության ամենահին բնութագիրը հայկական աղբյուրների մեջ մնում է հորենացու տված՝ Երվանդակերտ դաստակերտի պեճճ ու գունեղ հայտնի նկարագրությունը (II, ԽԲ)։

Միանգամայն պարզ է, որ այստեղ մենք գործ ունենք ոչ թե հելլենիստական շրջանի մի դաստակերտի նկարագրության, այլ դաստակերտների մասին հորենացու պատկերացման հետ, բայց սա էլ քիչ արժեք չունի. ինչպես հորենացու մի շարք այլ տվյալների մեջ, որոնց մասամբ անդրադարձանք, այստեղ ևս արտացոլված է մի երևույթ, որի արմատները հասնում են մինչև հելլենիստական շրջանը։ Այդ պարզ է դառնում, երբ համեմատում ենք հորենացու տվյալները դաստակերտի ավելի վաղ շրջանից եկող բնութագրի հետ, որը պահպանվել է այսպես կոչված «Բաբելոնյան թալմուդում» (մ. թ. առաջին դարեր)²³, ինչպես նաև մասնատիրական տնտեսության էլ ավելի հին (մ. թ.

²¹ С. Т. Еремян, О рабстве и рабовладении в древней Армении, ВДП, 1950, № 1, էջ 21։

²² Նույն տեղում։ Գ. Սարգսյան, Դաստակերտները և ագարակները V դարի հայկական աղբյուրներում, «Պատմա-րանասիրական հանդես», 1962, № 3, էջ 82։

²³ С. Т. Еремян, ԴՊՊ. — շխ.։

ա. III դար) նկարագրության հետ, որը գտնում ենք Փոքր Ասիայից ծագող մի արձանագրության մեջ²⁴:

Համեմատությունը ցույց է տալիս, որ նմանությունը սոսկ արտաքին բնույթ չէր կրում: Խորենացու, ինչպես նաև հայկական այլ աղբյուրների (Փարպեցի, Ագաթանգեղոս) տվյալները դաստակերտներում աշխատող «ծառայ»-ների և մշակների մասին, համընկնում են հելլենիստական շրջանի մասնատիրական տնտեսություններում աշխատող այն ստրուկ-հողագործների նկարագրի հետ, որոնց, ի տարբերություն կլասիկ տիպի ստրուկների, բնորոշում է անվանել «հողի վրա բնակեցված (նստեցված) ստրուկներ»: Նրանք թեև ընչազուրկ էին և անվերապահորեն գտնվում էին տիրոջ տրամադրության տակ, սակայն նրանց կցված էին հողակտորներ, տրված որոշ գործիքներ ու ընտանիք կազմելու իրավունք: Իրենց կցված հողամասի բերքից նրանք որոշակի բաժին էին ստանում:

Ստրկական ուժի աղբյուրները Հայաստանում նույնն էին, ինչ որ հարևան երկրներում, այն է՝ ներքին և արտաքին:

Արևելյան երկրներում ներքին աղբյուրը հատկապես մեծ նշանակություն է ունեցել: Պարտալին ստրկության, տաճարային նվիրատվությունների, երևխանների վաճառքի, ինքնավաճառքի, հանցագործների ստրկացման և այլ երեվույթների մասին (որոնց հանրագումարը հենց կազմում է ստրկական ուժի ներքին աղբյուրը) մեզ հասած տեղեկությունները ծագում են Եփրատի միջին հոսանքում տեղավորված Դուրա-Նվրոպոսում, Բաբելոնիայի քաղաքներում, Շոշում և այլ վայրերում գտնված վավերագրերից: Հայաստանում, ղժբախտաբար, նման վավերագրերի հետ միասին գրեթե բացակայում են նաև ստրկության ներքին շուկայի մասին տեղեկությունները:

Դրա փոխարեն առկա անտիկ և հայկական մատենագրական աղբյուրները մի շարք տեղեկություններ են տալիս ստրկական ուժի արտաքին աղբյուրների՝ պատերազմների և նվաճումների ժամանակ կատարվող գերեվարությունների մասին: Կարևորագույն տվյալները վերաբերում են, իհարկե, Տիգրան Բ-ի ժամանակաշրջանին, սակայն աղբյուրները ցույց են տալիս, որ գերեվարությունները հատուկ են եղել ոչ միայն այդ ժամանակաշրջանին, այլ կիրառվել են նաև նրանից առաջ՝ մ. թ. ա. II դարի առաջին կեսում ու հանդիսացել Հայաստանի ստրկատիրական տնտեսության զարգացման կարևոր գործոններից մեկը: Մովսես Խորենացին, նկարագրելով Արտաշես Ա-ի օրոք կատարված խոշոր գերեվարությունները, իր պատմածը եզրափակում է հետևյալ խոսքերով. «Արտաշեսը բազմամարդադրեց Հայոց աշխարհը բազմաթիվ օտար ազգերի ներմուծելով և բնակեցնելով լեռներում, դաշտերում և հովիտներում» (II, ԾԶ): Այս տեղեկությունները իրենց կողմնակի հաստատումն են գտնում Ստրաբոնի, արդեն մեկ անգամ վերը մեջբերված, տվյալներում, որոնք, թեև չհիշատակելով գերեվարությունների մասին, տալիս են Արտաշեսի օրոք կատարված նվաճումների վառ պատկերը:

Գերեվարվածների մի մասը ստրկացվում էր: Ռազմագերիները ստրկացման մասին Խորենացու մոտ պահպանվել է հնադույն ժողովրդական էպոսիդ մի հատված, ուր խոսքը նորից Արտաշես Ա-ի ժամանակների մասին է: Այս-

²⁴ W. N. Buckler and D. M. Robinson, Greek Inscriptions from Sardes, I, «American Journal of Archaeology», XVI, էջ 12 և հետ.

սուղ այդ գործողություններն ընդգրկված է որպես «ծառայեցուցանելով ի ստորկաց կարգի պահել» (այսինքն «ծառայ» դարձնելով պահել ստրուկների կարգում), արտահայտություն, որը իր հակիրճությամբ և հստակությամբ ավելի շուտ նման է իրավաբանական ֆորմուլայի և գուցե հենց այդպիսին էլ հանդիսացել է²⁵:

Ստրկացված գերիները օգտագործվում էին տնտեսության տարբեր ճյուղերում: Խորենացին հիշատակում է, որ Արտաշեսի գորավար Սմրատի կողմից բռնագրավված 500 «ծառայ»-ները, իսկ մի այլ դեպքում՝ գերեվարված սարերը, բնակեցվում էին դաստակերտներում (I, 4, II, ԽԸ), այսինքն վերածվում էին մասնատիրական տնտեսություններում աշխատող մշակների՝ հողի վրա նստած ստրուկների:

Այդ հանգամանքը առանձնապես մեծ նշանակություն ուներ մասնատիրական նոր տիպի, ստրկական աշխատանքով վարվող տնտեսությունների՝ պատակերտ-ազարակների առաջացման և բազմացման համար:

Հողի մասնավոր սեփականության զարգացումը վտանգավոր էր համայնական հողատիրության համար: Սկզբում մասնավոր հողատերերին բաժին էին բնկնում խամ ու խոպան, գյուղական համայնքների կողմից շօտագործվող ու նրանց սահմաններից դուրս գտնվող հողերը, ապա հերթը հասնում էր նաև համայնային հողերին: Հարուստ և ուժեղ հողատեր-ստրկատերերը այս կամ այն ձևով փորձում էին յուրացնել նաև այդ հողերի մի մասը: Համայնքը չէր կարող հանդուրժել իր հողերի ջլատումը և ծավալված պայքարը երեխ ուղեկցել է սուր ընդհարումներով:

Այս վիճակին վերջ պիտի դնե ազրարային ուժգործը, որի էությունը, ըստ երևույթին, մասնավոր և համայնային հողերի հստակ սահմանազատման մեջ էր: Ռեֆորմը ելնում էր նորելուկ հողատեր-ստրկատերերի շահերից, քանի որ օրինականացնում էր տեղի ունեցած փոփոխությունները: Բայց միևնույն ժամանակ այն ուղղված էր նաև համայնքի դիրքերի եթե ոչ ամրապնդմանը, զոնե պահպանմանը: Չպետք է մոռանալ, որ համայնքն էր հիմնական հարկային միավորը, և նա էր տալիս թագավորին հետևակ զորքի մեծ մասը և օժանդակ զորամասեր:

Հողային ռեֆորմի հուշարձաններ են Սևանա լճի ափին գտնված այն սահմանաքարերը, որոնց վրա արամեերեն գրված է Արտաշեսի անունը, տիտղոսը և ծննդաբանությունը, ինչպես նաև նշված է, որ քարերը գրված են հողի բաժանման կապակցությամբ²⁶: Մ. Խորենացին ճիշտ է կոռահել դրանց նշանակությունը, ասելով, որ Արտաշեսը այդ քարերով որոշեց «գյուղերի (այսինքն համայնքների — Գ. Ս.) և ազարակների (մասնատիրական տնտեսությունների — Գ. Ս.) սահմանները» (II, ՄԶ):

Ընդարձակված պետության կառավարման գործի գյուրացման նպատակը

²⁵ Մ. Խորենացի, II, Ծ, 86-ը. С. Т. Еремян, О рабстве и рабовладении в древней Армении, ВДИ, 1950, № 4.

²⁶ Հրատարակությունները տե՛ս վերը, 67 էջի 4 ծանոթագրությունում: Տե՛ս նաև A. Dupont-Sommet, Deux inscriptions arameennes trouvees près du lac Sevan (Arménie), «Syria», XXV (1946—1948), № 1—2, էջ 149 և հետ. К. В. Тревер, Очерки по истории культуры древней Армении, М.—Л., 1953, էջ 162 և հետ.

է հետապնդել երկրի վարչական բաժանման ռեֆորմը, որը կատարվել է Արտաշեսի կամ մի գուցե նրա հաջորդների օրոք²⁷:

Կատարված բազմաթիվ արշավանքները վկայում են, որ ռեֆորմի պետք է ենթարկված լինեին նաև ռազմական բնագավառը՝ զորքի հավաքագրման, կազմավորման ու ղեկավարման գործը: Անտիկ հեղինակներն այս մասին կոնկրետ տեղեկություններ չեն տալիս: Խորենացին է, որ հաղորդում է մի բարեփոխության մասին. Արտաշեսը զորքի իշխանությունը բաժանել էր շորս մասի, կարգելով արևելյան, արևմտյան, հարավային և հյուսիսային զորավարություններ (II, ԾԳ): Այս հաղորդումը փոխարձագանքում է Ստրաբոնի վերոհիշյալ վկայության հետ՝ նույն շորս ուղղություններով կատարված արշավանքների մասին:

Խորենացու մոտ պահպանվել են նաև այլ տեղեկություններ այդ ժամանակ կատարված նորմոծությունների մասին, ինչպես օրինակ, տոմարի վերանորոգման, երկրի լճերի և գետերի վրայով նավագնացության գործի բարեկարգման և այլնի մասին (II, ԾԶ), սակայն այս տվյալները կարոտ են հետազոտման ու ստուգման²⁸:

Կարևոր ձեռնարկություն էր թագավորական իշխանության հեղինակությունը բարձրացնելու նպատակով Հայաստանում իշխող դինաստիայի պաշտամունքի հաստատումը: Սելևկյանների և Պտղոմեանների օրինակով այն ընդունված էր հելլենիստական աշխարհի մի շարք երկրներում: Լավագույն ու մեթոդոր օրինակներ են Հայաստանի համար հարևան Կոմմագենեում հիմնրված ու Երվանդյանների տոհմի պաշտամունքին նվիրված տաճարները, հատկապես Նեմրոթ-դադ լեռան վրա կառուցված հույակապ սրբավայրը²⁹: Այստեղ Զեվս-Արամազդի, Ապոլոն-Միհր-Արև-Հերմեսի, Վահագն-Հերակլես-Արևսի և Կոմմագենե երկիրը սնող աստվածուհու կողքին, որոնց հսկայական քարե արձանները զարդարում են սրբատեղին, պաշտամունքի առարկա էր դարձված ինքը սրբավայրի հիմնադիրը՝ Անտիոքոս Ա Կոմմագենացին (97—34 թթ. մ. թ. ա.) և նրա նախնիները արական ու իգական գծով: Երվանդյանները իրենց ծննդաբանությունը հասցնում էին մինչև Աքեմենյանները և Սելևկյանները: Սրբատեղիում հաստատված էին բոլոր այդ նախնիների մեծադիր բարձրաքանդակները՝ համապատասխան հունարեն արձանագրություններով: Գլխավոր արձանագրության մեջ բացահայտվում էր սրբատեղիի հիմնադրման նպատակը և թվարկվում էին արքայական նվիրատվությունները, նույն թվում՝ «բավարար քանակությամբ հողերը և նրանցից անխախտ կերպով ստացվող եկամուտը»³⁰:

Այդ սրբատեղին պարզ պատկերացում է տալիս, թե ինչպիսի կառուցվածք ու տեսք պիտի ունենային Հայաստանի նմանօրինակ սրբավայրերը: Դրանց

²⁷ Plin., Nat. hist., VI, 9: Պլինիոս ավագը մահացել է մ. թ. 79 թ.: Դիչ Նավանական է, որ նրա հիշատակած վարչական տերիտորիալ բաժանումը կատարված լինի Արշակունիների օրոք, որովհետև նրանք իշխանության ղուլիս են անցել Պլինիոսի մահվանից ընդամենը 13 տարի առաջ՝ մ. թ. 66 թ.: Ռեֆորմը չէր կարող իրականացված լինել նաև մ. թ. I դարի առաջին կեսում, երբ Հայաստանի դահլի վրա անընդհատ փոփոխվում էին տարազգի թագավորներ: Հավանաբար այն անց է կացվել Արաաշխյանների ժամանակ:

²⁸ Հ. Մանանդյան, Քննական աեսություն, Ա, էջ 130:

²⁹ Տե՛ս Գ. Խ. Տարգսյան, Тигранакерт. Из истории древнеармянских городских обшин, М., 1960, էջ 33 և հետո:

³⁰ K. Humann und O. Puchstein, հիշ. աշխ., էջ 232 և հետո:

³¹ Նույն տեղում, էջ 273:

հիմնադրումը խորենացին վերագրում է կիսասպատմական Վաղարշակ թագավորին. «... մեհյաններ շինելով Արմավիրում, — պատմում է խորենացին, — նա հաստատում է այստեղ Արեգակի, Լուսնի և իր նախնիների անդրիները» (II, Ը): Ըսկ Արտաշեսի մասին պատմում է, թե նա մեհյան է շինել Արտաշատում ու այնտեղ տեղափոխել Արևի և Լուսնի (որոնք այս դեպքում անվանված են համապատասխանաբար Ապոլլոն և Արտեմիս՝ ճիշտ և ճիշտ նեմրոթ-դադի նման) պատկերները, ինչպես և նախնիների կուռքերը (II, ԽԹ): Ազաթանգեղոսը, խոսելով այս սրբավայրի մասին, հիշատակում է նույն աստվածությունների անունների երրորդ, հայկական գույգը՝ Տիր և Անահիտ³²: Քանի որ Արտաշես Ա-ը, դատելով Սևանա լճի ափին դրված արձանագրություններից, իրեն սերված էր համարում նաև Նրվանդյան տոհմից, ապա հնարավոր է և հավանական, որ նախնիների շարքում բացի իր հորից՝ Ջարեհից ու նրա նախորդներից, պատկերված են եղել Նրվանդյանները ու թերևս նաև սրանց հետ կապված Արեմենյանները³³: Նախնիների պաշտամունքի արտահայտություններից մեկն էլ այն է եղել, որ Արտաշես իր հիմնադրած քաղաքներից մի քանիսը անվանակոչել է, ինչպես կտեսնենք, իր հոր՝ Ջարեհի անունով:

Արտաշեսի ռեֆորմների մասին մեր տեղեկությունները, իհարկե, անհամեմատ ավելի քիչ են, քան իրականացվածը, բայց այդ քիչն էլ, ընդգրկելով հասարակական կյանքի շատ բնագավառներ, ջուլց է տալիս, որ ի դեմս Արտաշեսի հայ ժողովուրդը առաջնորդել է ոչ միայն տաղանդավոր ու հաջողակ մի ղորավարի, այլև մեծ քաղաքագետի և պետական գործչի:

Ժամանակի կարևոր հրեույթներից էր նաև քաղաքաշինությունը: Հելլենիստական Առաջավոր Ասիան ընդգրկված այդ հզոր պրոցեսը, որի ընթացքում ստեղծվել էին հարյուրավոր նորանոր քաղաքներ, իր արդյունքներն էր տվել Հայաստանում արդեն մ. թ. ա. III դարում: II դարում այդ գործը շարունակվեց ավելի մեծ մասշտաբներով: Դրա լավագույն արտահայտությունն էր Հայաստանի նոր մայրաքաղաքը՝ Արտաշատը: Պատահական չէ, որ այն կառուցվել է Արաքսի միջին հոսանքի հովտում՝ Արարատյան դաշտի շրջակայքում: Այստեղ են գտնվել պատմական Հայաստանի գրեթե բոլոր մայրաքաղաքները՝ Արմավիր, Նրվանդաշատ, հետագայում՝ Վաղարշապատ, Դվին (այժմ էլ այստեղ է ընկած Նրեանք): Արարատյան դաշտը, սկսած մ. թ. ա. IV դարից, դառնում է Հայաստանի սիրտը: Այստեղ էին խաչաձևվում հարավից գեպի հյուսիս, և Արաքսի վրայում՝ արևելքից գեպի արևմուտք տանող տարանցիկ առևտրական ուղիները, մի հանգամանք, որ վճռական նշանակություն ուներ Արարատյան դաշտի քաղաքների համար: Ռազմա-ստրատեգիական տեսակետն էլ անշուշտ իր դերն է խաղացել քաղաքի կոնկրետ տեղը որոշելիս: Ըստ Պլուտարքոսի, Արտաշատի տեղանքի բնորոշն է եղել Հաննիբալը՝ Հռոմի երբեմնի ահեղ թշնամին, որը իր հովանավորող Անտիոքոս Գ-ի պարտությունից հետո ապաստանել է Հայաստանում և «բազմաթիվ օգտավետ գործերում խորհրդատու հղել Արտաշեսին»: Նկատելով «չօղտագործված ու անտեսված հարմարա-

³² «Ազաթանգեղայ Պատմություն Հայոց», Տիգրիս, 1909, էջ 404:

³³ Տե՛ս Գ. Տիրացյան, հիշ. աշխ., էջ 14: Ինչ վերաբերում է Սելեկյաններին, ապա նրանց հետ Նրվանդյանների ազդակցական կապը հաստատվել է ավելի ուշ շրջանում՝ II դարի վերջերին. տես K. Humann u. O. Puchstein, հիշ. աշխ., էջ 313. Սելեկյանների տոհմից էր Անտիոքոս Կոմագենացու մայրը՝ Լադիկին:

դույն ու խիստ հաճելի մի վայր, նա տեղում ուրվագծեց քաղաքի հատակագիծը³⁴։ Թագավորը հավանեց և՛ տեղանքը և՛ հատակագիծը ու այսպիսով կառուցվեց «մի մեծ ու շատ գեղեցիկ քաղաք, որն անվանվեց Թագավորի անունով և հայտարարվեց Հայաստանի մայրաքաղաք» (Plut., Luc., 33)։

Որոշ գիտնականների տարակուսանքը Հաննիբալի՝ Հայաստանում լինելու հնարավորության մասին³⁵ չի նսեմացնում սույն հաղորդման կարևորությունը։ Անկախ Հաննիբալի մասնակցություն հարցի այս կամ այն լուծումից, Պլուտարքոսի հաղորդումից մենք իմանում ենք երկու բան. քաղաքի արտաքին տեսքը խոսում էր այն մասին, որ, նախ՝ նրա տեղը ընտրված է զորավարի աչքով և, երկրորդ, որ այն կառուցված է մեկ միասնական հատակագծի հիման վրա։ Անշուշտ քաղաքը պիտի կառուցված լիներ ժամանակի հելլենիստական քաղաքաշինության բոլոր կանոններով, ուղղանկյուն թաղամասեր կազմող խաչավորված փողոցներով և այլն։ Հենց այդ հանգամանքներն են, որ առիթ են տվել Ստրաբոնին ասելու, թե Արտաշատը «գեղեցկապես շինված-բնակեցված է և երկրի թագավորանիստ քաղաքն է։ Գտնվում է գետի թերակղզի կազմող անկյունում, պարսպապատ է զետափի երկայնքով, բացի պարանոցից, իսկ պարանոցը փակված է խրամով և պատվարով» (Strab., XI, 14, 6)։

Արտաշատի հիմնադրման մասին պատմում է նաև Խորենացին։ «Արտաշեսը գնում է այն տեղը, ուր խառնվում են Արաքսը և Մեծամորը և հավանելով բլուրը՝ այստեղ քաղաք է շինում անվանելով այն իր անունով Արտաշատ... և հանելով երվանդի քաղաքից՝ դերի հրեաների բազմությունը նստեցնում է նրանց Արտաշատում» (II, ԽԹ)։ Այստեղից իմանում ենք, որ Արտաշատ է տեղափոխվել երվանդաշատի բնակչության մի մասը³⁶։ Սակայն քաղաքային կյանքը թույլ էր զարգացած Հայաստանում և քաղաքների թիվը փոքր էր, ուստի հնարավոր էր սահմանափակվել միայն այլ քաղաքներից մարդիկ վերաբնակեցնելով։ Անշուշտ, նորաստեղծ Արտաշատում էր տեղավորվել նաև ռազմական արշավանքների ընթացքում գերեվարված բնակչության մի մասը։

Այս կապակցությամբ պետք է ընդգծել, որ Արտաշատը միակ նորաստեղծ քաղաքը չէր, որ բնակչության կարիք էր զգում։ Հիմք կա կարծելու, որ հիմնադրվել են Արտաշեսի անունը կրող ևս երկու քաղաքներ. մեկը՝ Վանա լճի արևելյան ափին³⁶, մյուսը՝ Նախճավանի կողմերում³⁷։ Բացի այդ, հիմնադրվել են նաև մի շարք այլ քաղաքներ, որոնք անվանվել են ոչ թե իրեն Արտաշեսի, այլ նրա հոր՝ Զարեհի անունով. զրանք են՝ Վասպուրականի Զարեհավանը, Բագրևանդի Զարեհավանը, Արշարունիքի Զարեհավանը, Ադիոպտի Զարիշատը և Վանանդի Զարիշատը։ Նոր հիմնադրված քաղաքը իշխող թագավորի հոր անունով անվանակոչելը նույնպես հելլենիստական քաղաքաշինության մեջ ընդունված սովորույթներից մեկն է եղել. այսպես, Սելևկյան դինաստիայի

³⁴ Տե՛ս օրինակի համար, Կ. Կ. Մոմմզեն, История Рима, I, М., էջ 709, ծան.։

³⁵ Հրեաների հիշատակությունը Խորենացու մոտ տվյալ կոնտեքստում պատմական մի անաբրոնիզմ է։ Իրականում հրեաները մասսայաբար Հայաստան են վերաբնակեցվել Արտաշեսի ժամանակից մեկ դար անց՝ Տիգրան Բ-ի օրոք։ Անաբրոնիզմի պատճառը Խորենացու ժամանակագրության այն յուրահատկությունն է, որի հետևանքով նրա մոտ Տիգրանի թագավորությունը ընկնում է Արտաշեսի թագավորությունից առաջ։

³⁶ Տե՛ս Ս. Կ. Երեմյան, Развитие городов и городской жизни в древней Армении, ВДИ, 1953, № 3, էջ 14։

³⁷ Գ. Խ. Տարգիսյան, Тигранакерт, էջ 43, և հետ., ծան. 59։

հիմնադիրը՝ Սելևկոս Ա նիկատորը իր հիմնադրած քաղաքներից 16-ը անվանել է իր հոր՝ Անտիոքոսի անունով՝ Անտիոքներ, նրա որդի Անտիոքոս Ա-ը հիմնադրել է մի քանի Սելևկիաներ և այլն (App., Syr., 57)։

Քաղաքների բազմացումը և քաղաքային կյանքի աշխուժացումը Հայաստանում հանդիսանում էր հայկական ստրկատիրական հասարակության բուռն վերելքի դրսևորումներից մեկը, վերելք, որ տեղի էր ունենում հելլենիստական Առաջավոր Ասիայի սոցիալ-տնտեսական նույնքան շեշտակի զարգացման ֆոնի վրա։

Վերելքի մի այլ դրսևորում էր և պետության հետագա ընդարձակումը։ Արևելյան և հյուսիսային ուղղությամբ կատարված արշավանքների հետևանքով Հայաստանին էին միացվել ընդարձակ երկրամասեր, որով պետության սահմանները հասել էին Կասպիականի ափերին՝ արևելքում և Կուր ու Ճորոխ գետերի հովիտներին՝ հյուսիսում և հյուսիս-արևմուտքում։

Երբ, այսպիսով, պետության այդ կողմերը ապահովված էին, հերթը հասավ արևմտյան սահմաններին, ուր վիճակը ավելի բարդ էր։ Այստեղ, Փոքր Ասիայում Փառնակ Պոնտացին, միանալով հարևան Փոքր Հայքի կառավարիչ Միհրդատի հետ, պատերազմ էր սկսել Կապադովկիայի և Բյութանիայի ու սրանց դաշնակցած Պերգամոնի դեմ, որը և տանուլ տվեց³⁰։ Արտաշեսին, որը հարել էր կապադովկական խմբավորմանը, այդ իրադարձությունների ժամանակ, ըստ երևույթին, հաջողվեց միացնել իր պետությանը Փոքր Հայքի արևելյան մարզերից երկուսը՝ Կարենիտիսը (Կարնո գավառ) և Դերքսենեն (Դերջան) (Strab., XI, 14, 5)։ Այս իրավիճակը օրինականացվեց 176 թ. կնքված պայմանագրով, որի մասին մանրամասն տեղեկություններ է տալիս Պուլբիոսը (XXV, 2, 1—12)։

Հայաստանի արևմտյան քաղաքականության բնագավառում ավելի կարևոր էր Ծոփքի խնդիրը։ Այդ երկիրը, որը բաժին ընկավ Արտաշեսի ընկերակից Ջարեհին և որը Մազնեսիայի ճակատամարտից հետո Մեծ Հայքի նման ինքնուրույն թագավորություն հայտարարվեց, անցած տասնամյակի ընթացքում ևս որոշ քայլեր էր կատարել իր հողերի ընդարձակման գծով։ Ջարեհին հաջողվել էր նվաճել ղեպի հյուսիս ընկած Ակիլիսենեն (Եկեղիքը) և Անտիտավրոսի կողմն ընկած հողերը (Strab., XI, 14, 5)։ Արկաթիասը՝ Ջարեհի որդին, հիմնադրել էր Արկաթիոկերտ նոր քաղաքը։

Ծոփքի վերամիավորումը Մեծ Հայքի պետության հետ դիտվում էր որպես կարևորագույն խնդիր։ Կասկածից վեր է, որ քայլեր պետք է ձեռնարկված լինեին այդ խնդիրը լուծելու համար։ Նման քայլերից մեկի հետևանքով Արտաշեսը իր ձեռքն էր գցել որպես պատանդների Ջարեհի որդիներից երկուսին (Diod., XXXI, 22)։

Երբ Ջարեհը մահացավ (հավանորեն II դարի 70-ական թվականների կեսերին), նրա գահի շուրջը վեճեր ծագեցին Արտաշեսի և Կապադովկիայի թագավոր Արիարաթի միջև։ Վերջինս պաշտպանում էր Ջարեհի ավագ որդու՝ Միթրոբուդանի (Մեհրուժան) թեկնածությունը, իսկ Արտաշեսը ցանկանում էր Ծոփքի գահի վրա տեսնել իր մոտ որպես պատանդ ապրող նրա եղբայրներից մեկն ու մեկին։ Նա պատվիրակներ ուղարկեց Արիարաթի մոտ իր առաջարկը իրականացնելու նպատակով, բայց սա, հակառակ ընդհանուր առմամբ

³⁰ Th. Reinach, Mithradates Eupator König von Pontos, Lpz., 1895, էջ 33։

ներանց միջև եղած լավ հարաբերությունների և նախկին ռազմական դաշնակցության, խիստ բացասական դիրք բռնեց այս հարցում. կապադովկիայի համար իր անմիջական հարևան Մոփքի կողմնորոշումը մեծ նշանակություն ուներ: Արտաշեսը ինչ-ինչ պատճառներով չցանկացավ սրել հարաբերությունները, և Միթրոբուզանը կապադովկիացիների օգնությամբ բազմեց իր հայրենի գահին³⁹: Այսպիսով, Մոփքի վերամիավորման հարցը հետաձգվեց գրեթե մեկ հարյուրամյակով:

Մեծ մտահոգության առարկա էր Հայաստանի հարավային սահմանը, որի ետևում գտնվում էին Սելևկյանները: Սելևկյան պետությունը, թեև նախկին իր հզորությունից զրկված, այսուհանդերձ վտանգավոր հարևան էր, մանավանդ այնպիսի երկրների համար, ինչպիսիք էին Մեծ Հայքը և Մոփքը, որոնք նոր էին ապստամբվել ու անջատվել նրանից:

Բայց ժամանակը անցնում էր ու Սելևկյանները չէին անդրադառնում Հայաստանին: Մագնեսիայի ճակատամարտից երեք տարի անց մահացավ Անտիոքոս Գ-ը (187 թ.): Նրան հաջորդեց Սելևկոս Դ-ը (187—175), որը գերադասում էր ընդհանրապես պատերազմներ չմղել, քան մղելով՝ պարտության վտանգի ենթարկվել: Այդ ժամանակաշրջանում Մեծ Հայքը դարձավ խոշոր և ուժեղ պետություն, ծավալվելով մինչև Հայկական բարձրավանդակի գրեթե բոլոր ծայրամասերը: Իսկ հարավային կողմում դեռ կային հայաբնակ երկրամասեր, որոնք դուրս էին մնացել պետության սահմաններից: Եվ ահա, հավանորեն 60-ական թվականների սկզբներին, հայկական զորքը ներխուժում է դրանցից մեկը՝ Տմորիք և նրա հարևան վայրերը ու միացնում այդ հողերը Մեծ Հայքին (Strab., XI, 14, 5):

Այդ ժամանակ Սելևկյան պետության գլուխ էր կանգնած արդեն Անտիոքոս Դ Էպիփանեսը (175—164 թթ.), որը վերջ էր տվել նախորդ իշխողի թուլամորթ քաղաքականությանը և բռնել տերության նախկին հզորության վերականգնման ուղին, արտաքնապես բարեկամական հարաբերություններ պահպանելով Հռոմի հետ: Անտիոքոսը արշավեց Մեծ Հայքի վրա, ըստ երևույթին, օգտագործելով Տմորիքի միացումը որպես պատերազմի անմիջական առիթ, և պարտության մատնեց Արտաշեսի զորքերին⁴⁰: Գրավված հողերը ետ խլվեցին: Սակայն 164 թվականին նա սպանվեց արշավի ժամանակ ու տարած հաղթությունների նշանակությունը գրեթե զերոյի հավասարվեց:

Անտիոքոս Էպիփանեսի մահվանից հետո Հայաստանը անմիջապես քայլեր է անում նախկին վիճակը վերականգնելու ուղղությամբ: Արևելքում այդ ժամանակ գլուխ էր բարձրացրել նախկինում Բաբելոնի, ապա Մարաստանի սելևկյան կառավարիչ Տիմարքոսը: Սա միավորում է Արևելքի՝ Սելևկյաններից դժգոհ տարրերը, և, ոգևորված Հռոմի բարոյական օժանդակությամբ, իրեն թագավոր հայտարարում: Արտաշեսը դաշինք է կնքում Տիմարքոսի հետ և օգնում սրան նվաճելու Հյուսիսային Միջագետքի հողերի մի մասը մինչև Զեվգմա (Diod., XXX, 27^a): Հասկանալի է, որ ինքն էլ, օգտվելով առիթից, վերամիավորում է հարավային, Սելևկյաններից զրաված ու Անտիոքոս Դ-ի հետ վերցրած հողերը:

Սրանից հետո Արտաշեսի մասին այլևս տեղեկություններ չունենք: Ենթադրվում է, որ նա մահացել է 160 թվականին⁴¹:

³⁹ Diod., XXXI, 22, Տե՛ս նաև Polyb., XXXI, 17, 5.

⁴⁰ Diod., XXXI, 17a, App., Syr., 45 և 60:

⁴¹ Հ. Մանանդյան, Քննական տեսություն, Ա, էջ 124.

Արտաշեսը, ըստ հորինացու մոտ պահպանված ավանդության, վեց որդի է ունեցել՝ Արտավազդ, Վրույր, Մաթան, Զարեհ, Տիրան, Տիգրան, որոնցից հերքը՝ Արտավազդը, Տիրանը և Տիգրանը հաջորդաբար թագավորել են հորից հետո: Վաղուց արդեն նշված է, որ այս տեղեկությունները մոտ են պատմական իրականությանը⁴²: Միանգամայն հավանական է, որ Արտաշեսի որդիներից մեկը անվանվեր Զարեհ, քանի որ Արտաշեսի հայրը հենց այդ անունն էր կրում⁴³: Ինչ վերաբերում է գահի վրա Արտաշեսին հաջորդած նրա որդիներին, ապա այլ աղբյուրներում հիշատակվում է Արտավազդը որպես մ. թ. ա. II դարի վերջերի հայոց թագավոր (Just., XXXIII, 3, 1) և Տիրանը՝ Տիգրան ձևով, որպես Տիգրան Բ-ի հայր (App., Syr., 48): Իսկ հորինացու Տիգրանը հենց նույն ինքը Տիգրան Բ-ն է, Արտաշեսի թոռը, որ ավանդության մեջ դարձել է նրա որդին⁴⁴:

Տարակուսելի է միայն Արտավազդ-Տի(գ)րանի հաջորդականության խնդիրը: Ավելի հավանական է, որ Արտաշեսին հաջորդել է Տիգրանը, ապա՝ Տիրան Բ-ի հայրը, իսկ նրանից հետո գահակալել է Արտավազդը, թագավորելով մինչև մ. թ. ա. 95 թ., այսինքն մինչև Տիգրան Բ-ի գահակալումը (Just., LXII, 2, 6):

Այս երկու իշխողների ժամանակաշրջանը, ըստ երևույթին, հարուստ չի եղել արտաքին իրադարձություններով և պատերազմներով, որի մասին բացի աղբյուրների լռությունից, վկայում է նաև նրանց իշխանության երկար տևողությունը: Միևնույն ժամանակ սրանք իշխել են միջազգային իրավիճակի արմատական փոփոխության, Առաջավոր Ասիայի քաղաքական ուժերի նոր տեղաբաշխման շրջանում:

160-ական թվականների սկզբին պարթևները պատերազմ սկսեցին Տիմարքոսի կողմից թագավորություն հայտարարված Մարաստանի դեմ և մի քանի տարի տևող պայքարից հետո նվաճեցին այն⁴⁵: Պարթև Միհրդատ Ա Մեծին (171—137 թթ.) հաջողվել էր ամրապնդել արևելյան սահմանները⁴⁶ և 145 թ. նա սկսեց իր առաջխաղացումը դեպի արևմուտք: Առավ Տիգրիսյան Սելևկիան, նվաճեց Բաբելոնիան, գրավեց Շոշը: Սելևկյան Դեմետրիոս Բ Նիկատորը (145—140 թթ.) փորձեց վերականգնել իր տերության սահմանները, բայց մասնակի հաջողություններից հետո պարտություն կրեց և գերի ընկավ պարթևներին: Սրա եղբայր Անտիոքոս է Սիդետեսը (138—129 թթ.) 130 թ. արշավեց պարթևների վրա, բայց նորից անհաջող: Երեք ճակատամարտերում հաղթանակ տանելուց հետո, չորրորդում նրա զորքերը ջախջախվեցին և ինքը սպանվեց: Սրանով հիմնականում Սելևկյանների դիմադրությունը կտրված էր: Պարթև Միհրդատ Բ (մ. թ. ա. 123—87 թթ.) ևս մի քանի հաջող արշավանքներ կատարեց դեպի արևմուտք և հասցրեց պարթևների տերության սահմանագիծը մինչև Եփրատ⁴⁷: Համաձայն Հուստինոսի հաղորդման, Միհրդատ Բ-ը

⁴² Տե՛ս Հ. Մանանդյան, Քննական տեսություն, Ա, էջ 135:

⁴³ Նույն տեղում, էջ 131:

⁴⁴ Նույն տեղում, էջ 135:

⁴⁵ N. Debevoise, A political History of Parthia, Chicago, 1938, էջ 21:

⁴⁶ P. J. Junge, Parthia, PWK RE, 36. Halbband, 1949, էջ 1962—2029:

⁴⁷ N. Debevoise, հիշ. աշխ., էջ 226 և հետ. P. J. Junge, հիշ. աշխ., նույն տե-

պատերազմել է նաև հայոց թագավոր Արտավազդի դեմ և պատանդ վերցրել թագաժառանգ Տիգրանին (XXXIII, 3, 1. LXII, 2, 6):

Սրանով ավարտվում է պարթևների աշխարհակալական ձգտումների իրականացման առաջին փուլը: Այն կանգ առավ դեմ առնելով մի այլ երկրի ստրկատիրական Հայաստանի հզորացմանը և աշխարհակալական ձգտումներին, որոնց իրականացնողը եղավ Տիգրան Բ-ը:

Г. Х. Саркисян

АРМЕНИЯ ВО II ВЕКЕ ДО Н. Э.

(Опыт систематического привлечения данных «Истории Армении» Мовсеса Хоренаци для освещения истории эллинистического периода)

Р е з ю м е

В статье излагается история Армении II века до н. э., преимущественно первой его половины, значительно более богатой событиями, знаменовавшими образование и укрепление государства Великая Армения.

Особенностью данного изложения является систематическое использование в нем материалов «Истории Армении» Мовсеса Хоренаци, привлекавшихся ранее для освещения этой эпохи лишь эпизодически. «История Армении», произведение, хотя и отстоящее от излагаемых событий не менее чем на семьсот лет, сохранила, однако, античную историческую традицию, а также народные предания, восходящие к эллинистическому периоду.

В отборе и использовании материалов «Истории Армении» Мовсеса Хоренаци автор статьи опирается на определенную методику (разработанную в других трудах автора), которая включает перекрестную проверку и подтверждение данных Хоренаци сведениями греко-римских повествовательных как и местных документальных источников, а также учитывает внутренние особенности «Истории Армении» и творческие принципы ее автора.